



ACEB

FUNDAZIUN
ARCHIV CULTURAL
ENGIADINA BASSA

Sent/Strada, ils 24 november 2020

Als commembers da la società „Archiv cultural Engiadina Bassa“

Stimadas damas, stimats signuors

Daspö passa 10 ons exista „l'Archiv cultural Engiadina Bassa (ACEB)“ ill'antieriura chasa da scoula dal cumün da Tschlin a Strada/S-chadatsch. La società ACEB chi maina l'archiv ha da prüm innan gnü l'intenziun dad aquistar localitats per pudair sgürar l'existenza dal archiv a lunga vista. Il lö sco eir il spazi chi sta a disposiziun a S-chadatsch s'ha verificchà. Perquai vulesch la società manar l'archiv eir in avegnir in quist stabilimaint.

Daspö la fusiun dals cumüns da Tschlin e Ramosch es il stabilimaint in possess dal cumün da Valsot chi nun ha però ingün adöver da la chasa e tilla voul perquai vender. Als 25 november 2019 ha la radunanza cumünala da Valsot fat bun la proposta da vender la chasa da scoula al ACEB per fr. 150'000.

Per pudair aquistar il stabilimaint e per til pudair sanar e mantegner ha la società ACEB in seguit fundà als 4 lügl 2019 la “Fundaziun Archiv cultural Engiadina Bassa”. Dal cussagl da fundaziun fan part Jon Carl Rauch da Sent sco president, Philipp Gunzinger da Scuol sco vicepresidente, Jon Duri Tratschin da Tschlin sco chaschier e Jonpeider Strimer dad Ardez sco actuar. Il documaint da fundaziun as poja examinar sülla pagina d'internet dal ACEB (www.archivcultural.ch/Fundaziun).

Il cussagl da fundaziun ha scleri che mezs finansials chi douvra per cumprar il stabilimaint e per til sanar. Il preventiv muossa cha sper la somma da cumprita da fr. 150'000 esa da far quint cun circa fr. 820'000 per üna sanaziun totala. Il proget ed il preventiv as poja eir examinar sülla pagina d'internet dal ACEB.

Il cussagl da fundaziun es consciaint dal fat cha üna sanaziun totala nun es pel mumaint realistica e po gnir previsa be a lunga vista. Pel mumaint as tratta unicamaing da cumprar il stabilimaint per fr. 150'000, e sco prossem da realisar las masüras urgiaintas, voul dir la fasa I dal preventiv. Ils cuosts per quista prüma fasa s'amuntan a fr. 158'000. Ulteriuras investziuns pudessan lura gnir realisadas plü tard, tuot tenor las pussibilitats finansialas.